

حسن الأقصرى

حروف حافية

شعر

صدرت الطبعة الأولى فى يناير 2019



(أشعار)

حروف حافية

بطاقة الكتاب

عنوان المؤلف :	حروف حافية :
المؤلف :	حسن الأقصرى :
التصنيف :	شعر :
رقم الإيداع :	26776 - 2018 :
عدد الصفحات :	94 صفحة :
رقم الإصدار الداخلي :	313 - الطبعة الأولى يناير 2019 :
جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من المؤلف	

دار النيل والفرات للنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



دار
النيل والفرات
للنشر والتوزيع
أسسها الشاعر ناجى عبد المنعم
عام ٢٠١٧

رخصة مزاولة مهنة: 58365 - سجل تجاري: 13242 / 2017 - بطاقة ضريبية: 35-01-572
عضو عامل باتحاد الناشرين المصريين رقم 941 لسنة 2018
هاتف: 01011256943 - 01116202218 - 01202541192 تليفاكس: 020554372901
alnilwaalfourat@gmail.com alnilwaalfourat
المقر الرئيسي: ج.م.م. محافظة الشرقية - العاشر من رمضان - مجاورة 13 - أمام سنتر الـ 13 - عقار 304

إهداء

أتقدم بالشكر والتقدير إلي كل من ساهم
في خروج هذا الكتاب إلى النور ليصل بين
أيديكم وأرجوا أن أكون قد قدمت إليكم ما يحترم عقولكم
ويندي صدوركم
والشكر خاصة لزوجتي وأولادي وزملائي
وأساتذتي الشعراء الذين تتلمذت على أيديهم وأستقيت من
علمهم وإبداعهم

المؤلف

أفديكِ بروحي

على قد الأحزان جوانا
والدنيا تمللي معاندانا
لكن فرحنا بيكِ يابلدي
بيغطي الحزن ويبفوت
والدمعة بتمسحها إيدينا
ومحدثش فكر يواسينا
لكن دائماً نكرم ضيفنا
إن شالله من الجوع نموت
وشبابك صخر بأوجاعه
بيجيب اللقمة من دراعه
يصبر ع الجوع وع القلة
ويصونك لو بالنبوت

أفديك بروحي وأولادي
لجل تعيشي أموت أنا عادي
وارث من عزة أجدادي
عزة مينا وحتشبسوت
مهما نلف ومهما ندور
ياللي جمالك حاجة تحير
حاجة ف عز الضلمة تنور
في الصخر تاريخك منحوت
أفرح لك أكثر م الفرحة
وأغزل لك بدموعي الطرحة
لجل تنامي عيوني بتصحى
إن شالله أرجع لك في تابوت

ولما الحزن يتعمم

ولما الحزن يتعمم
على كل النفوس في الحي
ولما القلب ييضم
وفي الزحمة يتوه الضي
وشوش كالحة من الأوجاع
ورغم عنها مبتسمة
بترسم ضحكها الخداع
وتغزل م المرار نسمة
وتكسر ضهرها الأحزان
فتمسح دمعها ف سكوت
وجواها الأسى بركان
بيفضح حزنها المكبوت

وايه الفرق
ما بين الحياة والموت
وقلبك صقر
لكن ملمحك كتكوت
تعيش عمرك بتاكل حبتك بسباخ
ولو تعطش بتشرب مية الأوساخ
تقيل حملي على كتفي وبتكفي
دماغي فيها ميت حفلة وميت زفة
وجنب الحيطه بتخفي
بلا مركب ولا دفه
وشايل لقمتي الناشفة
أغمزها بأسى ودموع
ألمم دمعتي بكفي
ولا أشكي ولا أبكي
وصابر ع الشقا والجوع

سنين العمر ذلوهة
ما بين الآها والآه
وبين اللوعة والتوهة
ولقمة بأكلها بالدقة
وحبة ضحك مسروقة
من العازل أخبيها
ولما أدخل على أولادي
أداري الهم وأبديها
وإيه فيها
ما دام الحزن متفصل
على أد الفقير بالضبط
ودار الفرح ما بييه
وبين عش الغلابة خط
كان الفرح راح يتلظ
لو صاحب في مرة فقير !

وهو النسر راح ينزل
ويشرب مية العصافير!
وإيه فيها
مادام روعي كساها الجوع
ولما اللقمة بجنيها
بيتحدايني ميت مفجوع

مددت يدي لأتسول
فتات من بقايا الخبر
تدوس كرامتي الأقدام
وما أسوأ شعور العجز
وحلمي في لقيمات
تقيم العود إن جفَّ
وأدفع لوعة الخيبات
والأسقام لا تشفى



ترى الأفواه خلف الباب تطلبني

وألقي عين ترقبني

وتجذبني أيادي القهر

وتطرق رأسي الآهات

وألّف فاتورة في الشهر

وَأَدْعُوا فِي مُصَلَّاتِي

أَعْجَلْ بِإِنْقِضَاءِ الْعَمْرِ

وَأُطْفِئِ عَلَى إِسْتِحْيَاءِ

تَفْتَشْ فِي بَقَايَا الْقَدَرِ

وَنَظَرَاتِ بَأْعَيْنَهُمْ تَطَالَعْنِي

تَلَاَحِقْنِي قَذَائِفُ نَارِ

أَمَا تَدْرُونَ أَبْنَائِي

بَأْنِي قَدْ شَقَّقْتَ الصَّخْرَ

هَجَرْتَ النُّومَ بِالْأَسْحَارِ

كَيْ أَصْحُوا قَبِيلَ الْفَجْرِ

حملت بعاتقي الآمال
ممتطياً جواد الصبر
أطوف دروبنا الحمقاء لا أرجوا
كنوزاً أو نياقَ حمر
وأدعوا الله في أطراف مسبحتي
وحسن توكلي في الجيد ملفحتي
جعلت الله في قلبي وفي ذاتي
نزفت الدم كي أجني لقيماتي
ولم تدرِ المسامع كيف آهاتي
ولكن شكوتي لله يسمعي
أنا ربي بحار الظلم تبلعني



حروف حافية

أشد الكلمة فوق السطر بالعافية
واقول موهوب يقولوا الفطرة مش كافية
بدون قافية تحس إن الحروف حافية
ومتجافية وطعم الشعر فيه بهتان
لا عمري عرفت معنى القافية والأوزان
ولا إتصفت في بحر العروض عالم
وعمري ماكنت في دنيا المتون فنان
أقول الشعر من إحساسي ومسالم
أقول شاعر يجيب الحرف من ديله
وأقول ساحر يشق البحر منديله
ومين غيري بيعمل م الجليد بركان
قالولي لابد تدرس نحو بالتصريف

عشان الشعر من غيره يادوب تخريف
وتبقى ضعيف وفي بلاد الأدب غلبان
أنا إنسان أبيع الشعر بالمجان
حروفي تحط وتنبت في أرض البور
أنا الرنان حروفي تمط مط لبان
وتصبح حبل يخنق أي كلمة زور
أنا المسحور وبغزل م المعاني بحور
أصيد أسرار في بطن الحرف مختفية
في كل الدور حروفي تشق شق النور
سفينة نوح تتشكل من القافية
أبات مفتور أبات مسرور مش فارقه
مادام نفسي تبات في أمان

المجدولة

ولأنه قلبٌ معنى
بالذنوب ومبتلى
جائز تكون التوبة دي
آخر الطريق
ولربما حانت نهاية عاثر
عاش الحياة مكبل
ويمر من ضيق لضيق
كان ماشي دائماً ف الحياة
عكس إتجاه
لو كان تأمل ف السما
ورفع إيديه يدعو الإله
لودمعة واحدة ف العيون

تمسح ذنوبه من الحياة
لكنها الدنيا غرور
لم تدع في القلب ضي
لن تستكين وتنتهي
مادام في الدنيا تقي
فتظل تنخر بالدروب
تعثر القدم السوي
ما آن آن لتستحي
ليظل قلبك في المشيب
بروعة القلب الصبي
إيه إلهي خلى الدنيا بتعادي البشر
تقسى عليه القسوة دي
إيه إلهي خلى الكون بحاله
يجور علينا ويفتري
يتبقى إيه

ساعة خروج الضي من جسدي العتيق
جسمي إلي كان ماشي يسابق خطواته
يجري ورا حلمه إلي تاه
ويصارع الهفوات والذلات في كل إتجاه
لا ربما في القبر بعد الموت قد تأتي الحياة
أوربما في توبتي تأتي النجاة
ومشيت في نفس الإتجاه
وأخذت نهجي من غباء العنكبوت
إذ جاء يغزل خيطه في مرفئ للشاحنات
وبكيت جرحي في بلاد الصم
ورفعت رايات التصوف فوق دور الغانيات
وقضيت عمراً في التبتل والتوسل والسخط
بس العبط إني سلكت طريق غلط
طريق عوج مشبوه ومليان باللغظ
هو إلي هيقابل حبيب

ياخذ معاه فدان زلط؟
علشان يصح الإشياق
لازم نشيل م القلب لو ذرة نفاق
علشان تقب من الغرق
لازم يكون جسمك أخف من الورق
لازم يكون رزقك حلال
لقمة تغمزها بعرق
فإنوي المتاب
لا تركزنّ إلى اللحى وإلى النقاب
لا تركزنن إلى الأحاجي والحجاب
قبل الوصول إلى الغرق
أذ تبلغ الروح الشرق
إنوي المتاب
ساعتها بس هينفتح لك ألف باب
وتزف مسواك الأخير ملائكة بيض الجناح

تتزين الجنات ل إستقبالنا
يا مرحباً أهل المتاب
في يوم لا يجدي العتب
في يوم لا ينجيك مالٌ
أو تلالٌ من ذهب
يا مرحباً أهل المتاب
إنوي المتاب
قبل العروض على الحساب
جائز تكون التوبة
هي النجاة من الغرق

ياسجدة

صباحك شهد يازينة
ياوردة مزينة جنينة
بتنشر عطرها فينا
وترسم ضحكة ملو قلوب
نهارك فل ياقمري
يازهرة وفتحت بدري
غزالة في عشنا تجري
بضحكتها الحديد يدوب
نهارك فل ياسجدة
على باب الكريم عابدة
ولوزيك كمان واحدة
هتمشي الدنيا بالمقلوب
عيونك نجمتين مرمر

وبدرك في السما نور
وقلبك م السما أكبر
شروقك هل بعد غروب
تزيد الخضرة في الغيطان
وتكسي الصحرا بالألوان
ولو كان الغضب بركان
ومن نظرة يسير سرسوب
يانبض القلب ضحكاية.
يا أجمل قصة وحكاية
جميل الخد كعكاية
على قالب ذهب مسحوب
تدور الشمس وتدور.
سحابة تهل وتمطر
وتحلو الحياة أكثر
صبحت بحبك المجذوب

صباح الفرح يا قمره.
سحرتي الدنيا من نظرة
مسيرك تكبري وبكرة
يدوب الكل فيك دوب
يدوب الكل في رحابك.
صفوف تترص خطابك
وتتعلق على بابك
وتتحذف قوالب طوب

حرف على الجدران

مش مجنون علشان أخطب

وأمشي ملخبط

واكتب حرفك ع الجدران

وأمسك فرشاة وأرسم فرشاة

وغرقانة بدمع وأحزان

وأجمع رمل البحر وأخطط

وأرسم سهم وقلب منقط

نقطة هجر ونقطة حنان

وأرسم قصر ولمة وعيلة

وأرسم كوشة وزفة وليلة

وأغاني وأجمل ألحان

على فكرة أنا عاقل لسانى

فاكر جرحى ومين الجاني

وكل الذكرى إلي بتوجعني
بس مسير الحق يبان

لوقالوك

لو قالوك إني شاعر
خضرة جوايا المشاعر
بس جرح القلب واعر
أقوى من فدان حنان

تمللي حروفي مكسورة
في طرف لساني محسورة
لا يمكن توضح الصورة
لو إنحرمت من الألوان
أنا إللي شربت فدان ضي
ولسة الضلمة جوايا
وشعري مندبة للحي
حزين القافية والأوزان

بلاش تنبش في قبر الروح

تصحي الذكرى جوايا

بتحلم إن طير مدبوح

ف يوم هيغني من تاني

قطرة ورا قطرة

ياللي رموشك ندى
للمجروحين ترياق
وعيون تكيد العدا
وتلهب الأشواق
يانجمة وسط الليل
تنده على قلبي
ولما قلبي يميل
بتروحي تتخي
حني على الولهان
بالرمش و النظرة
وإديله قسط حنان
قطره ورا قطره
بحلم بلحظة دفا

في العش تجمعنا
وتكون عنيك الشفا
من كل أوجاعنا
يأم العيون غزلان
تجرح ولا تسمي
والقلب داب حرمان
إمتى تشيل همي
أنا في الغرام مجنون
يأم الرموش غية
في عيونك المسجون
مدفعتش الدية

إحنا دولة

من تاريخ الود بينا
حبنا لازم يعيش
راح نكيد إلهي حاسدنا
إحنا دولة وليها جيش
مش هيدخل بينا فاسد
عمره م يفرق روحين
متصانين والرب واحد
والحسود له ألف عين
الله لا يعين إلهي باعنا
إلهي خان عيشنا وخدعنا
وإلهي يتسلى بوجعنا
وبدموع المجروحين
جاي تطول النجم فينا
تقطع الحبل المتين

شرع مين قال لك عادينا
أي نهج وأي دين
إحنا مش عمال مقاوله
إحنا شعب ف أقوى دولة
لو عملت 200 محاولة
حسبتك تطلع مفيش
إحنا 100 مليون وواحد
مولودين من بطن واحد
متولدش ما بينا جاحد
من حلايب للعريش
إحنا مرتبطين ببعض
مستحيل نخلف لوعد
ف الشدايد صوتنا رعد
لو في قلب النار نعيش
إحنا دولة وليها جيش

لملم جراحك

بتحسبيني يادنيا عايش

إيه الدليل؟

هي ساعات بتمر

من مر لى أمر

ودموع تشق بحور

ترسم سطور متعرجة

على خدود الحر

وكل حلم حلمت بيه

طيف وسحاب

قدام عيوني كان يمر

وهم وخداع

وكل مرة ألملم الاوجاع

وأرجع لأول سطر

بتوهميني بعيشة حرة
وتسجنيني سنين عجاف
وبتدبحيني ألف مرة
بتحسبيني اني هخاف؟
ونسيتي إني من صدر أُمي
رضعت قهر
الخوف ده كلمه
منقوشة ف كتابي
في كل سطر
وكل طرفة من رموشي
وكل ثانية من حياتي
كان يمر
روحي إسألني الليل إلهي كان
دايماً ونيسي
روحي إسألني الحزن إلهي كان

دائماً جليسي
فيكي يادنيا الشهد
أصبح جمر
إيه دليلك إني عايش
الفرحة معدومة
والضحكة مكتومة
جسمي هزيل
تمثال نحيل ومكفنيه غدر
معادش شئ منه أخاف!
أخاف علي بيتي
اللي هو مش بيتي
إللي تحول قبر
اصدق مين
أمي تقولي بيت جدودك
وابويا قال متأجرين

واخويا بيقول إنه باعه
علشان يجيب لك لقمتين
متغمزين بالمر
طب هما فين
على الأقل كان سد
جوع الخاويين
إلي معاتش ينفع معاهم صبر
ابويا قالها من سنين
لا مفيش
واجيب منين علشان نعيش
لازم نسلم نفسنا للفقر
امي بتشحت م الجيران
وبيت الكرم اصبح جعان
وانا إلي طول العمر
بيتي ملاذ المحتاجين

كل الغلابة إلي إغتوا
من مص دمي من سنين
نسيوا سنين الفقر
نسيوا إلي فات
وفضلت عايش ع الفتات
العيشة خل
وبعد عز شبعث ذل
أروح لمين
لما الأسد يصبح أسير
عند إلي كان راعي حمير
وصبح أمير
مش هي دي سنة حياة
حامي الحما يصبح اسير
عند الحفاة عند العراه
صبحوا رجال

وبيشترونى بالدينار وبالريال

بتبيعني ليه يابا

لأشباه الرجال

نسيوا إيلي فات لما بقو

اصحاب مصانع وعمارات

اصحاب قصور

اصحاب تحف وإكسسورات

وفضلت انا عامل أجير

وأمد إيدي وأقول له هات

حقي عليك

ولا أنت ناكل ليلي فات

يقولي حقك يابني مات

أترجي فيه

لجل الاخوة لقمتين

يرد يقولي أخوة إيه

د انت أجير

آخرك تكون عندي غفير
فرشك تراب من غير سرير
وخسارة فيك حتي الحصير
اخوة إيه

إنتم إخوات متفرقين
اخذك بتخدم ف القصور
وأخوك بينحت ف الصخور
وابوك بيرهن أرضكم
وقبض تمنكم من سنين
متفرقين. !!!؟

ركبت فوق الريح
قوام علي بلدي جريت
الآقي أمي بالسواد
واقفة بباب البيت

صرخت يأمه إيه جرى
لما سافرت سيبتك غزال
متحنية ومشيت
قالت لي سافر يا حسن
ارجع قوام مكان م جيت
لا الأرض سارت أرضنا
ولا لك مكان ف البيت
أكبر خواتك معتقل
وواحد إتصاب بالخبيل
قلبي خلاص مليون علل
إلي إتقتل وإلي قتل
وبدم بارد
يصرخ يقول
انا البطل انا البطل
ليه الميزان صابه الخلل

رديت وقلت ابويا فين
يمكن يكون هو الأمل
ردت ابوك باعنا خلاص
سابنا ونايم في العسل
ياأمه قوليلي إيه حصل
هو إحنا مين
لعنة صابتنا
ولا جازر محسودين
طول عمرنا متجمعين
من بطن واحد مولودين
ياما محن مرت علينا
ولا عمرها كانت بتفرق
إن كان ده أحمد ولا مينا
وفي كل محنة بيلمع
الأصل إلهي فينا

لو يوم نغيب أو نفترق
بإشارة واحدة ترجعينا
ولا أحنا ضلينا المسير؟

سقف الأوضه

حاولت أكتب لاقيت الحرف مش راضي

كأنه ديحة بتقرب من السكين

أقول جايز يكون سن القلم فاضي

لاقيت الحبر من جواه يفور براكين

أنا المسكين بقاسي من الحنين والشوق

ولو شق الضلوع تلقى الحشا محروق

قالولي إنت يادوب عايش أقول جايز

بدون أمني بقيت من جملة المساكين

في عز البرد ألاقي الجسم متحرر

وطعم الشهد جوا الحلق متمرر

وجرح القلب مش نافع معاه تسكين

وقلبي من الوجع يشكي ومين يسمع

شبعث كفوف على وشي وإيه يمنع

مادام الضهر متعري لميت سكين
وبعدك يأمه صوت الضحكة محبوسة
أنا الفقري ولا الدنيا إلي منحوسة
أنا والحظ مين فينا إلي كاره مين
ولسه سامع ضحكك يأمه
ساعة صفا لما يروق الحال
ولسه شايف دمعك لما
أحلم وحلمي ينقلب لمحال
فاكر حنان الحزن والضمة
كانت في ليل البرد دفاية
فاكر سنين الفرح واللمة
وعيون تخللي الدنيا ضحاكية
عزمك جبل واقف يصد الريح
كفك أمل بيداي في المجاريح
والضحكة كانت تفرش الأوضة

وتحسسينا إن إحنا في الروضة
نلقى الألم بينط م الشباك
لما تقولي الفرح جاي هناك
كانت سمات الطيبين فيك
زي النهار بيهل في العتمة
والشوك يفتح ورد ف إيديكي
وإنتي في ليل الوجع راضية ومبتسمة
أمي إيلي باعت عمرها لينا
باعت صيغتها وعافت الزينه
تبص للسقف إيلي مغطينا
بيت الشقا ميهدوش زلزال
سقف الغلابة إيلي إتخرم من فوق
وحيطان أوضتنا في كل حته شقوق
دايماً عنيتها مشعلقاها لفوق
وتقول يارب أستر معانا الحال

مرفوعة دائماً للسماء كفوفك
محنية دائماً من الأسى كتوفك
مادام معانا العون كل الحمل تتشال
ولا عمرها للفقر بتوطي
وتقوللي توب الستر بيغطي
والصحة أجمل من كنوز المال
وتقوللي بالتأكيد بعد الهزائم نصر
والرزق بكره يزيد والعشة تصبح قصر
إيدك في إيدي أكيد تتوزع الأحمال
كان الأمل موجود أخضر ومترعرع
بس القدر موجود مكتوب ومتوزع
وقدرها كان أسرع حامي كحد السيف
بيذل وبيوجع ويهد فينا جبال
بيذل وبيوجع ويهد فينا جبال

إلى الشاعر مصطفى تيسير

طول م أنت صاحب قلم

يبقى الأدب بأمان

بين الشواعر علم

بتزلزل الوجدان

وسط الحروف بحار

عايم على بركان

تزرع في أرض الألم

بستان ملوهش أركان

وفي عالم العشاق

لك ألف باع وباع

بتلاعب الأشواق

وتطبيب الأوجاع

لو حد كان إنسجن

بالحرف والأوزان
وصبح أسير الشجن
راح يلاقيك سجان
لو زاد علينا الحزن
تصنع حروف تفاريح
أسد في وش الجبن
وجبل تصد الريح
كل الطيور ع الشجر
تعرف أكيد بوحك
والشعر ساعة سفر
يبكي على نوحك
بالحبر ترسم درر
بديعة الألوان
في الرقه زي المطر
وفي الغضب بركان

لو للأدب شطين
تبقى أنت أولهم
والشعرا لو عايزين
لازم تمولهم
وفي صفحة التاريخ
تشبه جواد حطين
م الأرض للمريخ
بحرك بلا شطين
تصبح حروفك خيل
في الغزو جباره
ع الأرض زي السيل
في البحر بحاره
لو الحروف تتحنى
أو مره تتمرد
وتجرب اللودنه

م المعنى تتجرد
لو أي شاعر علم
جنبك بيصبح خيخ
لو للأدب أضرحه
تبقى أنت فيها الشيخ

دويتو / هو وهي

هو

بحلم بقلبك جوا قلبي يصبره
وأعيش حياتي جوا منك
وأطير أنا زي النسيم
ساعة ما أسمع ضحكة منك
وأجمع زهور الدنيا
وأكتب عليهم اسمك
"ياروح حياتي بحبك"

هي

بحلم أكون الهوى
وطبيبة لجراحك

وكلامي يبقى الدوا غنوة في أفراحك
أكون ف ليلكمر والضحة لصباحك
ياكل أملي بحبك

هو

بحلم أكون الضحة من بين شفايفك
وأمسح دموعك من عنيك وأشيل جراحك عنك
وأكون نسيم الورد يملا الكون من حولك
وأكون هوى عطر ودوا لقلبك

هي

ياهل ترى بتحبني على أد م بحبك
ياهل ترى ساكنة ف هواك ولا غيري خد قلبك

هو

لسه ياروحي بتسألني إن كنت أنا بحبك
سهر الليالي والدموع تشهد على حبك
تشهد عيوني السهرانيين ويشهد على ربك. والله أنا بحبك

هي

معرفش ليه إحساس غريب
خوفني من حبك
إحساس غريب شككني فيك
وخفت أنا منك
وقالي إنك مش برئ
مفيش أمان عندك " وبردته أنا بحبك

هو

متسمعش ل كلام

يبعدني أنا عنك

لو عاوزه يوم تظمني م الصبح أكون عندك

راكب حصاني وأخطفك

من ناسك ومن أهلك

أدفع عيوني شبكتك

وقلبي يكون مهرك

والله أنا بحبك

ومضات الأقصري

بسر الحب وعذابه
وعاشق فارق أحبابه
ترجع للحزين غابه
وأحبابه إلي قسيو عليه
وحق اللحن والموال
ومر إلي ضناه الحال
وإلي الدمع منه سال
وعنيه م البكا دابو
وحبايبه ما حنو عليه
وشوق الورد للمية
وحضن الأم حنية
رموش تجرح بحنية
وترجع تاني تبكي عليه

وَحَقُّ الْبَدْرِ وَأَنْوَارِهِ
وَعَرِيبُ تَايِهِ فَ مَشْوَارِهِ
يَفْتَشُ عَنْ طَرِيقِ دَارِهِ
وَإِيهِ ذَنْبُهُ فَ دُهُ كَلَهُ إِيهِ
وَحَقُّ إِلَهِي كَوَاهِ الشُّوقِ
وَنَفْسُهُ لِلْحَنَانِ يَدُوقُ
يَا رَبِّ أَنْتَ إِلَهِي عَالِي فَوْقِ
وَحَنَانِكَ مَفِيشُ بَعْدِيهِ

راجعلك يا حبيبة

راجع لك يا حبيبة
بعد سنين الغياب
والدمع مالي عيني
وقلبي شايل عذاب
راجع لك بالأمني
وسنين شوق وحنين
لكن قلبي بينزف
زي ماقال الكتاب
ومين داري بأنيي.
والمر اللي ف سنيني
وليه امي تسبيني
للبعد وللغياب
انا راجع امي نادم
وهعيش العمر خادم

من بعدك عيشي عادم
وطعم السكر تراب
عايش في مدينة زحمة
وناس فوق ناس ملاحمة
وقلوب منزوعة رحمة
وقصور لكن خراب
راكب سيارة بمبي
ومكانك فاضي جنبي
وشالك جبته تلجي.
صافي بلون السحاب
رضاك يا أمي دين
ومناسك نبين
قرآن في القلب ساكن
يفتح للجنة باب
انا راجع بالمواقع

وقطر شبابي راجع
شوقي يسطر مراجع.
يكتب مليون كتاب
أنا راجع ليك خايف.
يكون القلب شاب
وشباب فارق جيني.
بعد ما طال الغياب
راجع بس أوعديني
إنك مش هتلوميني
لو بالهجران كويتك.
وجرحتك بالغياب
عارف إنك قاسيتي
ولا بعدي حنان لقيتي
كفاية مرار وغربة
تهنا ف زمن قلاب

راجع لك يا حبيبة
بس بلاش العتاب
راجع لك يا حبيبة
بعد حياتي الغريبة
إنتي الوافية القريبة
وصبري علي السنين
هنعيد الذكرى تاني.
وسنين حب وأمني
الغربة مهيش مكاني
قلبك بلدي الحنين
ابوس واحضن إيديك
بعد القسوة عليك
يا جمال الصبر فيك
ياما إتحمل أنين
راجع أمي الحبيبة

والفرحة أكيد قريبة
وبقلبك تحضنيني.
وبشوقك والحنين
من بعدالتوهة راجع.
بعد سنين المواجه
وليل عشته لوحدي
زيك سهران حزين
حالي يشبه لحالك.
حاسس بلي جراك
دموع جواك تجرح
في القلب والعين
بحلم والود ودي
أمسح دمعك بيدي
لبحور البعد أعدي
وأرجع ف غمضة عين

الرملة بلون الحنة

إستنا إستنا إستنا
بحلم أنا ولا بتمنى
أنا شوفت الدنيا بعيني
لونها بيشبه للحنة
بحلم أنا ولا بتمنى
شوفت المرمر واللولي
وصبايا يبيتسمولي
كل العصافير غنولي
لا أنا فعلاً في الجنة
شوفت نجوم كثير كثير
والقمره بتشرب م الزير
والأطفال زي العصافير
ترقص لنا وتتغنى

إستنا إستنا إستنا
شوفت طيور أشكال ألوان
والأرض بتشبه بستان
والرملة بلون الحنة
إستنا إستنا إستنا
شوفت كتير بس إستنا
شوفت النحلة بتملا الكاس
بعسل صافي وتسقي الناس
والدبور غاير منها
شوفت البحر بيضحك لي
والفراشات بحري وقبلي
فوق المية بتتغنى
بحلم أنا ولا بتمنى
لون السما أزرق دافي
فيها حمام أبيض صافي

لما أندده له يستنا
شوقت الليل قمره العالي
ونجومه تلالي تلالي
وملايكة داير مايدور
طول الليل حوالين منا
بحلم أنا ولا بتمنى
ولا أنا فعلاً في الجنة

كل العالم حبوني

في الشده أكيد تلاقيني
زي الصخر وبتحمل
وبقول للنذل ف وشه
عمري م نافق وأجمل
ولا أحب اللون المايع
دوغري وعمري مباحول
لو وسط النار يرموني
النار تصرخ وتولول
كل العالم حبوني
وكتير فيا بيتغزل
وصبايا كتير حبوني
وقالولي سمارك يهبل
لوعينك جت في عيوني

علي طول قلبك يتزلزل
لما أوعد وعد أوفي
مش بخلف ولا يستندل
وبيفضل دين في رقبتني
وبوصي عيالي تكمل
انا قولت كتير عن نفسي
كفاياني كلام ولا أكمل

سلامي

سلامي لكل أحبابنا
نجوم الحرف كتابنا
ولو نبعد أكيد نلقى
حنين ليهم بيسحبنا
يقولوا الدنيا فراقه
أقول لازم هنتلاقي
مادام الروح مشتاقه
أكيد خطاويننا تغلبنا
ومهما الروح بتتغرب
أحس إن اللقا قرب
ودمعة م العيون تهرب
في يوم الشوق هيجيبنا

واكل ناسه

قالو الفقري نحيف متسلوع

ياما إتلوع بين الناس

لما يطاطي بصوته الواطي

واكل ناسه بدون إحساس

لما يفكر يرفع راسه

ينسى أساسه

كل الناس بإيديها تهشه

حتي الدنيا تغور من وشه

دبور لازق فوق الراس

يفضل طول العمر معنس

عمر ميقدر يوم يتجوز

واللي يحبها

يبقى يا غلبها

وإلي يفكر يوم يخطبها
ويقرب لها
أحسن ليها تفوت قطرها
وتحفر قبرها
وإلي بتحلم إنه يكون لها
يبقى ياذلها
أحسن لها تقفل قلبها
وتحط عليه مليون ترباس
ممکن ييجي ف شكل وظيفة
ممکن ييجي ف بدلة نضيفة
بس نصيحة!
دا واد تلقيحة. وجتة قبيحة
تحت البدلة تلاقي فضيحة!
بدون إحساس
آه لو بس في سكة قابلته

كنت قفّلت ببياني في وشه
كنت قتلته كنت إرتحت
وكان ريحت الناس من سيرته
وساعتها هتدعيلي الناس

المعلم

ياإللي الرسول كرمك
وف كل دين متصان
في العلم ما أعظمك
ملاك ف توب إنسان
واخذ صفات الأوليا
ف النبيل والأخلاق
علمك ميراث الأنبيا
جوه القلوب متصان
قوم للمعلم وإنحني
وإضربله ألف سلام
هو المربي والإمام
والنور ف كل مكان
مين علمك مين فهمك

مين بعده راح يهديك
نور حياتك سلمك
دايما لسكه امان

لم كلابك

أنا مش طمعان بس متبت
وفي أرضك غارز ومنبت
رايح أو جاي راح تتثبت
إن كنت صغير ولا كبير
أنا شوكة ف روحك وفيزورك
حتى في أحلامك ح نزورك
مطرح م تكون هيجيك دورك
ان كنت مريش ولا فقير
عامل زي الديل المحني
كل م أفرد يرجع يتني
أدي نصايح أجني فضايح
إيد بطالة تهد ال مبني
ومرابط في نهاية الحارة

تسكت حبة وتنبح تاني
عامل زيطة وعامل غارة
إبليس متشعبط في وداني
لم كلابك وإقفل بابك
زمنك مش راح يرجع تاني



قصيدة ملقاة في مركز التعليم المفتوح 2014

ولا كان ع البال ولا ع خاطر
من تائي أشيل علي كتفي كتاب
سهران الليل لما بذاكر
والصبح أتلّم مع الأصحاب
وبعزم وإصرار قررنا
إن إحنا نغير في قدرنا
ونروح الجامعة ندق الباب
شايّل كشكول ويا كتابي
وبراجع واجبي وبحسابي
نفضت لكل إلّي منفسن
ماشّي بيتريق و يلسن

من بعد م شاب راح الكتاب
أربع سنوات عدو عليا
وعرفت أنا فيها كثير أحباب
والعقل إتفتح وعنيا
وعرفت الصادق م الكداب
نتلف ف دايره مع الشله
مر الأيام بيهم تحلا
ويارب الصلبة تدوم ياشباب

طعم ثاني

ليه يانجم الليل ماترحم
في العيون دمعي كواني
ليه حارمني حتى احلم
حزن في القلب وسباني
الأمل بكره هيرجع
والدموع هتجف ثاني
والعزول هنسيبه يولع
بكره راح يضحك زماني
وف عيون اولادي يلمع
حلم بيبوس الأمانى
والكبير بالحب يرفع
الصغير لو يوم يعاني
إللي يسجد وإللي يركع

واللي بالرحمة دعاني
لو يتوب ربي ويشفع
يتقل الخير ف ميزاني
ياعظيم الفضل أوضع
بركة الرزق ف غيطني
بالعرق أروي وأزرع
وأحصد الزرع ف ثواني
وأما أحصد ثاني يطلع
لون جديد وطعم ثاني
كل عود أخضر مرعر
بالكرم ربي حباني

لحن الوداع

اعذريني مقدرش احبك
قلبي في حالة ضياع
كان في حالة حب قبلك
معتش يتحمل خداع
اعذريني مش ناسيك
بس قلبي ممالش ليك
مال لناس من قبل منك
إنجرح منهم وضاع
اعذريني نفسي احبك
نفسى قلبي يميل لقلبك
بس قساه إلي باع
اعذريني مقدرش احبك
مفيش ف قلبي مكان لقلبك

ذنبك إيه تتحمليني
إرحلي عني وسبيني
وإعزفي لحن الوداع
قلبي عاش يحلم بغيرك
لا إنتي طيره ولا هو طيرك
شوفي غيري انا شوفت غيرك
بس غيرك خان وباع
قلبي في حاله ضياع



مركب من ورق

ساعة شعورك بالألم

إمسك قلم

إرسم قصور فيها خدم

جرب تعيش الانفصام

جرب تعيش الهرتلة

نشف دموعك بإبتسام

إرسم شجر إرسم مطر

أو طفل رافض للفصام

إياك تسلم للغرق

أو تبني مركب من ورق

أو تمشي في السكة الحرام

أخرج خلاص م المعتكف

وأعلنها ثورة من الحروف

وإمسك قلم تلقى الألم
ببشع من بين الكفوف
دور تلاقي المشكلة
جائز هناك.. جائز هنا
مش ترمي حملك ع الظروف

مد الإيد

ياسيدي مد الإيد بيضر ما بيفيد
اصبر تلاقى خير يملا الضروع و يفيض
فيه ناس بترضع عسل لحد ما تكرش
وناس بترضع ذل بس التكال ع السيد
إرفع أيادي فوق وإشكي الضنا والجوع
من هم طال الكل شجرة وليها فروع
دا الظلم ساكن قصر عالي ومتعرش
والفقر زي الطفل ع الكف لسة ولید.

مشاكسه مع الشاعر جابر الزهيري

~~~~~

أولا/الزهيري

كاتبك و قلبك قاريني

و الشوق لقولي ملاكي

قالوا عليكي قريني

مع إنك انتي ملاكي

---

الأقصري

مع إني صايم لديني

والصوم مكتف وراكي

لساني سارح أديني

في كل شارع وراكي

الزهيري  
سارح لفين يا ياسين  
لم الكلام يا قريبي  
اقرأ فطه و ياسين  
لا يضيع صيامك حبيبي

---

الأقصري  
قرأت حتى المعوذتين  
وياسين والتين وطه  
واللي قرأته ياعين  
زود غرامي و شفاها

---

الزهيري  
عوذت روحك ما راق  
يا اللي تعوذت بالتين  
ف الصوم واحدة و مرقت  
جاي ليه بتعشق ف بتين؟

---

الأقصري  
ربك يحاسب بنية  
ولا حيلتي غير القوايل  
معذور عاشق البنيه  
ممكن يسوي الهوايل

---

الزهوري  
النية سودا و صيني  
يومين و يفسد عملها  
للعشق جاي تباصيني  
انا حدوده عاملها

---

الأقصري  
النيه بيضا ولولي  
ذي القماش ف المغازل  
كل الحبايب قالولي  
احذر لكيد العوازل

---

الزهوري  
كيد العوازل مالوشي  
و لا فتلة جوا المغازل  
عتابهم ان ما يلوموشي  
ع اللي ف بناتهم يغازل

---

الأقصري  
إلي بيدخل بيناتنا  
بنيه صافية وطاهرة  
وإلي يغازل بناتنا  
هيكون عقابه المطاهرة

## فكر الإرهاب

داير بتدبر في مكاييد  
وتفرق بين البني آدمين  
عايش دايماً دور العابد  
حامي السنة وواصي على الدين  
فكر الإرهاب مزروع جواك  
وبتطلب مننا نتبعك  
وبتحلم إننا نبقي معاك  
ونسير أعوانك أو تبعك  
تفكيرك وغرورك خدعك  
والأخرة نهايتك زي الطين  
باب العبودية خلاص إنسد  
ومفیش مخلوق يستعبد حد  
وجبال الذنب عليك تنهد  
تصبح في الدنيا من الملاعین

ولوحده عالم بتفكر  
تحررق في مداين وتفجر  
وتهد المبني وبتكسر  
حلمك تتنصب تبقى أمين  
وتماشي الكل بتفكيرك  
ولا حدش يأمن تكفيرك  
شيطانك ساكن في ظميرك  
وبدقنك عامل راجل دين  
والراية السودا على دماغك  
تتستر بيها على خداعك  
تسرح شياطينك أتباعك  
تتشطر بس على المساكين  
الكون له خالق ومحاسب  
من حقه يسامح ويحاسب  
أقعد مع نفسك وإتحاسب

لو لسه في قلبك ذرة دين  
شايفينك قرد ومتسلسل  
ماسك تسبيحة ويتمثل  
في بلادك تحرق وبتقتل  
تخربها لصالح ناس تانيين  
أوصفك توبة وكفارة  
إسترجل مرة وعدي حدود  
فيه ناس بتحارب بحجارة  
جايز تبقى المهدي الموعود  
روح جرب مع ربك تاجر  
كسبانة الحسبة بدون خاسر  
وبسرعة إتوجه على غزة  
بالفخر تحس وبالعزة  
لو مت في طعم الموت لذة  
وساعتها هتكسب دنيا ودين

## شعر غنائي/ بيعي

خلاص بعثيله أحضانك  
وفاضل من كرامتك إيه  
تسيبي الجنة قدامك  
وقلبك في العذاب ترميه  
تخوني العهد وتبيعي  
مهانش عليكي توديعي  
بعيد عني راح تضيعي  
زرعتي الشوك وراح تجنيه  
مادام خنتي هنتخاني  
مادام بعتي هنتهاني  
وغدرك بكرة راح تلقيه  
مليت بالورد بستاني  
جنيت الجرح ويا دموع

أكيد هتجيلي من تاني  
وتشكي بدمعك الموجوع  
وساعتها هسيبك تشكي كتير  
ولا عمر دموعك هتأثر  
صوتك في القلب ملوش تفسير  
وكأنه كلام مش متفسر  
وهتبكي وأقولك أبكي كتير  
وأقولك إشكي كمان أكثر  
علشان القلب ماعاد يسمع  
ولا عمره لحبك راح يرجع  
إكمني ف وشك بابي إنسد  
حلمي إلهي بنيته خلاص إنهد  
والذكرى الحلوه إندفنت فيه

## رقيتك

عيونك نجمه بتفتح مع البساتين  
وخذك شهد أطعم من مربى التين  
خفيف الظل والضحكة كريستال حر  
حبيب الكل بتهون علينا المر  
تروح روعي معاك ساعة م بتغرب  
وترجع تاني لما لحضني بتقرب  
تنام عيني ويفضل حلمي سارح فيك  
يتوه عقلي ولكن قلبي مستنيك  
يا أجمل زهرة ف جناين ماليها الضي  
وأجمل شمعة بتنور ضريحي الحي  
ومالك زي تتنطط على كتوفي  
يا عمري الجي بتتبت علي كفوفي  
ساعات الدنيا بتمرر في قولة أه



وبيك البدر بينور ويملا سماه  
رقيتك م الحسد مني وكل الناس  
ويحميك الفتن ياإبني وم الوسواس

## السيرة الذاتية للشاعر



الاسم /حسن محمد ياسين  
الشهرة /حسن الأقصري  
حاصل علي بكالوريوس تجاره عين  
شمس  
موظف كلية الطب بجامعة حلوان  
مواليد الأقصر

ويعيش بالقاهرة صدر له ديوان كروان بلا لسان بالعاميه  
المصريه وله ديوان فصحي باسم الأرض الجزر له ديوان  
مشارك شعراء حروفهم علي وجه القمر وديوان مشترك  
باسم مبدعو الأوركسترا  
وديوان مشترك باسم ألحان وادي النيل. وديوان مشترك باسم  
حروف ناطقة  
عضو رابطة شعراء العرب. عضو مؤسس جمعية إبداع  
الثقافيه وعضو مجلة صرير الأقلام  
محرر صحفي بمجلة إشراقه حاصل على العديد من الأوسمه  
والجوائز ونشرت له العديد من الصحف مثال  
جريدة الأخبار الآن وجريدة عيون الشرقيه وجريدة الأقصر  
وجريدة الشعر العربيله عدة لقاءات تلفزيونيه

تم تكريمه بوسامين ذهبيين من جريدة أضواء مصر  
حاصل علمركز أول وطن عربي في مسابقة حروف ذهبيه  
أكثر من مره عن جمعية إبداع الثقافيه ومركز أول وطن  
عربي عن مؤسسة وادي النيل للنشر والتوزيع  
حاصل على المركز الثالث بمسابقة مبدع العرب عن مجلة  
الضياء

وتم تكريمه من دار الكتب والوثائق عن مسابقه حروف  
ناطقه. تم تكريمه من دار الأدباء ورابطة عزف الأقلام  
العربيه تم تكريمه من مجلة الثقافة العربية.

تم تكريمه من التجمع العربي لرعاية المواهب.  
وجريدة أسرار الأسبوع. وجريدة نصف الساعة. ومجلة  
عظماء الكلمة. ومركز شباب الأميرية وصالون رؤية  
الثقافي. ومجلة أحرار الجزائر الأدبية. ومؤسسة صدى  
الفصول العراقية. والرابطة العربية لشعراء العامية  
وغيرهم.

. متزوج وله أربع أبناء

**hasan.elaksory @gmaile.com**

**<https://www.facebook.com/elaksory>**

تم بحمد الله

## محتوى الكتاب

|    |                        |
|----|------------------------|
| 2  | بطاقة الكتاب           |
| 3  | إهداء                  |
| 4  | أفدك بروحى             |
| 6  | ولما الحزن يتعمم       |
| 12 | حروف حافية             |
| 14 | المجدولة               |
| 19 | يا سجدة                |
| 22 | حرف على الجدران        |
| 24 | لو قالوك               |
| 26 | قطرة ورا قطرة          |
| 28 | إحنا دولة              |
| 30 | لملم جراحك             |
| 40 | سقف الأوضة             |
| 44 | إلى الشاعر مصطفى تيسير |
| 48 | دويتو هو وهى           |
| 52 | ومضات الأقصرى          |
| 54 | راجلك يا حبيبة         |
| 59 | الرملة بلون الحنة      |
| 62 | كل العالم حبونى        |

|    |                                                |
|----|------------------------------------------------|
| 64 | ..... سلامى                                    |
| 65 | ..... واكل ناسه                                |
| 68 | ..... المعلم                                   |
| 70 | ..... لم كلابك                                 |
| 72 | ..... قصيدة ملقاه فى مركز التعليم المفتوح 2014 |
| 74 | ..... طعم تانى                                 |
| 76 | ..... لحن الوداع                               |
| 78 | ..... مركب من ورق                              |
| 80 | ..... مد الإيد                                 |
| 81 | ..... مشاكسة مع الشاعر                         |
| 86 | ..... فكر الإرهاب                              |
| 89 | ..... شعر غنائى - بيعى                         |
| 91 | ..... رقيتك                                    |
| 93 | ..... السيرة الذاتية للشاعر                    |
| 95 | ..... محتوى الكتاب                             |